

那文毅公奏議

那文毅公二任陝甘總督奏議卷二十二目錄

卷二十二

控制番氓

西陲蒙回

那文毅公二任陝甘總督奏議

目錄

一

邵文毅公二任陝甘總督奏議卷二十二

上海市歷史文獻圖書館藏

男容安恭輯

控制番氓

嘉慶十五年四月初六日會同西寧辦事大臣文孚

奏為黃河冰橋融消撤回西寧防兵事竊臣文孚於上

年冬間商同前任督臣松筠酌派西寧官兵四百

名在黃河北岸鄂倫布喇克等處分段防範緣由

曾經恭摺奏

聞在案本年春令冰融已將北岸防河官兵於二月十五

日全數撤歸本營維時署督臣勒保起身進京未克隨時具奏茲查防河官兵既經於二月十五日全數撤歸原營臣那彥成業已到任辦事自應循照舊例會銜具

奏至秋冬間再爲細察情形欽遵前奉

指示諭旨將此項官兵逐漸減撤或另行熟商別有籌辦可以不費正帑爲一勞永逸之計臨時再行奉旨皇上訓示遵辦謹

奏奉

硃批知道了

嘉慶十五年五月二十四日會同西寧辦事大臣
文公孚

奏爲拏獲偷搶蒙古牲畜賊犯審明定擬事竊照本年
二月十一日據青海柴達木地方住牧札薩克勒
勒克喇布坦差派章京稟報上年十二月內有循
化番子五十餘人前來搶去我們旗下駱駝十四
隻馬一百二十匹牛一百二十五隻羊三千二十
三隻本年正月內又有循化番子六十餘人前來
將我屬下蒙古塔布爾殺死又傷蒙古四名搶去
駱駝二十一隻馬二百一十九匹牛四百隻羊六

千九百七十一隻並搶去烏鎗腰刀等物本日又據札薩克恩克巴雅爾旗下章京稟稱我們現在年班進京上年十二月內有河南賊番五十餘人前來搶去我們旗下牛七十三隻羊二百五十七隻本年正月內又有循化番子六十餘人前來搶去駱駝二隻牛十六隻並搶去烏鎗等物各等語臣文孚當卽差派通丁馬忠馳往查驗蒙古傷痕並臣劄循化廳營上緊查辦間臣那彥成到任後卽將該營熟悉番情守備張輝傳調來省面加嚴諭去後茲據該員等將賊番喇卜許古蒙古城犯默洛

二名先行拏獲解送到案臣文孚率同司員筆帖式等詳加審訊據喇卜許古供年三十二歲原係循化多哇族番搬到加咱族內住牧上年十二月內我與同族番子剛洛商量糾約現在加咱族內住牧番子蒙古共十九人分爲三股前往青海偷搶我們這一股番子剛洛丟古沙木番子喇嘛尼納克木古里羣瓦蒙古默洛共七人遂使默洛引路到柴達木地方搶了馬六十五匹牛七隻駱駝三隻羊約有一千餘隻駱駝疲乏後拋棄了羊隻在路上倒斃宰食約有數百隻其餘牲畜回來後

我們七人儘數分了每人約得多少不等他們兩股內十個番子兩個蒙古是誰爲首共偷了多少牲畜如何俵分我聽的不真不敢妄供本年四月內加咱族喇嘛把我及默洛誘出就被官兵拏來了剛洛等聞得查拏甚嚴俱皆攜帶家口逃到循化南界外章灘地方去了我們到柴達木時蒙古全行驚散並無打仗殺人的事我此外並沒做過賊默洛供年四十歲是札薩克格勒克喇卜坦旗下蒙古因貧窮躲避差徭逃到番地居住三年了上年十二月內喇卜許古等約我引路偷搶許給

牲畜我便同行引到柴達木地方偷了回來曾經
分給我馬匹等物餘供與喇卜許古同再四嚴訊
矢口不移案無遁飾查蒙古例載偷竊牛馬駝羊
四項牲畜數至三十匹以上者不分首從擬絞監
候秋審時俱擬入情實等語數年來循貴兩廳所
屬各生番頗知懾懼歛蹟今喇卜許古等竟敢糾
合十餘人潛赴青海地方偷竊牲畜數至盈千實
屬愍不畏法默洛身係蒙古膽敢夥同賊番指引
路徑偷搶本旗牲畜情尤可惡喇卜許古默洛二
犯合依偷竊四項牲畜數至三十匹以上不分首

從擬絞監候例擬絞監候惟是蒙古番子不服內地水土最易病斃現當甫經懲創之後自應從嚴辦理以儆其餘未便稽遲以致倖逃顯戮且供據確鑿無需待質相應請

旨將喇卜許古默洛二犯卽行正法以昭炯戒至逃往章

灝地方賊犯

臣

等現已嚴交該廳營督同囊素喇

嘛番目等務必設法按名緝拏俟獲解到案審明

另結所有被搶牲畜查明追出時交主收領適據通丁馬忠回稟稱遵查蒙古塔布爾被賊搶去牛羊衣服跟踪等情遺棄疲乏牲畜氣忿凍餓身

死實非登時刃殺伊子當下已將其屍骸照蒙古
風俗焚化其蒙古四名見賊奔逃肩背等處受傷
甚輕早已平復原報之協理台吉龐密亦自認圖
昧草率等語查札薩克格勒克喇布坦現尙年幼
其代管旗務協理台吉希圖聳聽以致呈報張皇
此風亦不可長臣文孚已將該旗印信移交隣近
札薩克恩克巴雅爾兼管並將龐密交該札薩克
照例責懲謹

奏奉

硃批該部速議具奏

嘉慶十五年九月二十三日會同西寧辦事大臣

文公孚

奏爲拏獲偷搶蒙古牲畜賊犯審明定擬事竊查嘉慶十四年十月據台吉恩克巴雅爾稟稱本年七月內有循化番子到我遊牧地方搶去馬五十餘匹牛十二隻並搶去衣服等物等語臣等當卽屢次嚴飭循化廳營上緊查緝務獲茲據該廳營督同守備張輝將逃往番族夥同偷搶之蒙古賊犯札科環貫桑吉洛碩瑪宛等四名拏獲陸續解送到案臣文孚率同筆帖式等將各犯隔別詳加審訊

據札科供年三十九歲係蒙古台吉瑪吉格策楞
旗下人因爲貧苦逃到循化番地給人傭工度日
上年六月內有亡爾的族番子棍木却克恰里首
先起意約會了番子策楞沙木哈里哈及現在舊
地居住的蒙古環貫桑吉喀碩瑪宛伊里甘敦共
是八人前到青海地方搶了蒙古及路遇商人的
馬六十七匹騾子三頭又搶了衣服等物我們八
個人分了我們去時行到托素諾爾地方桑吉喀
碩瑪宛二人的馬匹乏病在那裏住下並未同去
搶劫我們回到托素諾爾纔分了馬匹物件一同

回來是實此外並沒作過賊等供環貫桑吉喀碩
瑪宛各供與札科相同再四嚴訊加以刑嚇矢口
不移案無遁飾查蒙古例載偷竊馬牛駝羊四項
牲畜數至三十匹以上者不分首從擬絞監候秋
審時俱擬入情實其爲從未經同行僅於竊後分
贓者減發雲貴兩廣烟瘴地方交驛地充當苦差
各等語現據獲犯衆供確鑿自應按律科斷發落
無需監禁待質此案札科等二犯夥同番賊偷竊
蒙古牲畜至七十四之多實屬不法札科環貫合
依偷竊四項牲畜數至三十匹以上不分首從擬

絞監候例俱擬絞監候秋審時俱擬入情實桑吉
喀碩瑪宛等二犯既於竊後分贓亦應照例科斷
桑吉喀碩瑪宛合依爲從未經同行僅於竊後分
贓例俱減發雲貴兩廣烟瘴地方交驛地充當苦
差其未獲首從各犯臣等現已嚴交循化廳營文
武官員按名查緝俟獲解到案審明另結謹

奏奉

硃批該部議奏

嘉慶十五年九月二十三日會同西寧辦事大臣

文公孚

奏爲續獲偷搶蒙古牲畜賊犯審明定擬具奏事竊查
本年二月內據青海台吉格勒克喇布坦等呈報
上年十二月本年正月內曾被循化野番偷搶二
次_臣等當卽飭交該廳營將喇布許古等二犯拏
獲審明定擬於本年五月內奏蒙

聖鑒在案數月來_臣等仍不時嚴催該員等上緊躡緝不
得日久遂生疎懈並劄交隣近蒙古一體協同查
拏頃據該員等稟稱遵卽嚴密躡捕賊犯克鄂節
里因搜拏緊急自戕身死當卽割取首級令囊素
喇嘛及番目等認識屬實賊犯卓鄂乘間逃至蒙

古地方經郡王達什仲鼐旗下蒙古截擊鎗斃查
驗亦屬真確現將逃犯吉格默又喇布許古等同
夥內逃犯納木敦二名拏獲押解送案等語前來
嗣將吉格默納木敦二犯解送到案臣文孚率同
筆帖式等詳加審訊據吉格默供年二十五歲係
郡王達什仲鼐屬下因爲貧苦於上年夏間逃到
番地傭工度日於十一月內果加族番卓鄂色布
騰加二人起意約同凝喀爾札什喀木牙海吉洛
克鄂節里群瓦班第博拉番子堪木果呢共是十
人前往青海偷搶我便應允同行共搶馬九匹牛

四十餘隻走到黃河岸邊遇見加咱族喇嘛說是奉到公文查拏便將馬牛全行趕去我就逃至番地藏躲本年七月內始被拏獲我此外並沒做過賊據納木敦供年五十一歲係上郭密熟番近年到循化番地給人牧放牲畜度日上年十二月內番子納木喀等起意約同喇布許古等十九人分爲三股前往青海偷搶我就應允同行我們這一股六人共搶了馬牛四十餘匹騾二頭駱駝三隻羊約有一千餘隻我分了馬二匹牛二隻羊二十六隻其餘牲畜他們五人都分了偷搶時我先回

帳房燒火熬茶並未同搶我此外並沒做過賊名等供反覆嚴訊矢口不移案無遁飾查蒙古例載偷竊馬牛駝羊四項牲畜如數至三十匹以上者不分首從擬絞監候秋審時俱擬入情實其爲從未經同行僅於竊後分贓者減發雲貴兩廣州漳地方交驛地充當苦差名等語此案吉格默同番賊卓鄂等前往青海偷搶蒙古牲畜五十餘匹之多實屬愍不畏法吉格默合依偷竊四項牲畜數至三十匹以上不分首從擬絞監候例擬絞監候秋審時擬入情實納木敦旣於竊後分贓亦應照

例科斷納木敦合依爲從未經同行僅於竊後分
贓例減發雲貴兩廣烟瘴地方交驛地充當苦差
其首犯卓鄂業經鎗斃從犯克鄂節里情急自戕
旣已證據確鑿均應毋庸議被搶馬牛查明交主
收領未獲各犯臣等仍嚴飭該廳營認真緝拏俟
獲解到案訊明另結謹

奏奉

硃批該部議奏

嘉慶十五年九月二十七日會同西寧辦事大臣
文公孚

奏爲本年冬間西寧黃河北岸防守官兵遵

旨陸續裁減事竊照_臣文孚於上年九月內會同前任陝

甘總督_臣松筠具

奏俟冰橋結凍後黃河北岸防兵酌減二百名派撥官

兵四百名並委遊擊一員帶領防範等因奉

硃批依議欽此欽遵在案_臣文孚竊查數年來青海蒙古

仰仗

皇上天威稍有起色竊案亦少惟地界遼闊而蒙古積弱

已久雖近日稍能振作人心不一總須一二年後

方能望其齊整應請本年冬間冰橋結凍後再行

酌減官兵百名祇派西寧鎮屬官兵三百名並交
西寧鎮於遊擊都司內揀派一員帶領在黃河北
岸鄂倫布喇克一帶地方分段防察其應派蒙古
兵丁仍令各旗照舊攤派協同駐守並一面剴切
曉諭各札薩克等令其努力自強固守候一二年
後各游牧人心漸齊此項官兵即可全行裁撤當
與臣那彥成札商臣那彥成復查此項官兵逐年
漸次減撤原係遵

旨辦理於現在情形尙屬相宜如蒙

俞允俟冰橋結凍後卽當飭交西寧鎮總兵特依順保於

該鎮屬遊擊都司內揀派一員帶領官兵三百名
在鄂倫布喇克等處嚴密巡防仍於明年冬間再
行遞減所有官兵應得口糧鹽菜仍照上年支給
俟一二年後_臣等查看情形再行奏請全數裁撤
以省糜費謹

奏奉

硃批依議

嘉慶十六年三月十三日會同西寧辦事大臣文
公孚

奏爲撤回西寧防河官兵事竊照黃河北岸鄂倫布喇

克一帶巡防官兵上年九月經臣等酌議遞減兵一百名仍派兵三百名於冰橋結凍後揀員帶領前赴巡防聲明俟一二年後查看情形全數裁撤
奏蒙

聖鑒在案茲據西寧鎮總兵特依順保稟稱現在春令冰融所有上年派出之都司王殿甲帶領官兵已經照例撤回於三月初一日全數歸伍等情復查西寧番族自上年經臣等督飭廳員查清戶籍不能容留生事之人漸已安分畏法不敢別滋事端去冬以來青海衙門尙無具報搶劫之案較前實屬

安靜各旗蒙古札薩克等經臣等欽遵

諭旨勉以努力自強伊等頻年見有官兵爲之防守壯其
聲勢各安游牧不致被野番擾累感激

天恩亦頗自知振作本年秋冬之間前項防兵自可再行
遞減數目以節勞費容俟臨時察看情形另行籌
辦謹

奏奉

硃批知道了

嘉慶十六年九月二十日會同西寧辦事大臣文

公孚

奏爲西寧黃河北岸防兵照舊派撥及酌議減派緣由
事竊照西寧黃河北岸防守官兵自嘉慶十四年
酌減兵二百名十五年遞減一百名祇派西寧鎮
屬官兵三百名揀員帶領在於鄂倫布喇克一帶
分段巡防節經奏明在案自上年冰橋結凍派兵
防守及本年春間撥回以後臣等察看番情較前
竇屬安靜青海衙門控告搶竊之案日少各旗蒙
古仰仗

天威亦漸自知振作前項防兵本可全數裁撤惟是蒙古
積弱已久數年以來見有官兵爲之巡防野番斂

迹游牧相安其心實有所恃而不恐若一旦遽行
裁撤誠恐蒙古恇怯或啓野番覬覦之心現在冰
橋將次結凍臣等再三籌酌所有本年北岸防兵
應請照舊派撥惟於三百名之內再行遞減一百
名祇派西寧鎮屬兵二百名仍飭該總兵於遊擊
都司內揀派一員帶領責令嚴密巡查實力防範
其蒙古兵丁仍令各旗照舊分派隨同駐守至官
兵鹽菜口糧照例支給仍俟次年察看情形如可
全數裁撤再行請

旨辦理以節糜費謹

奏奉

硃批依議

嘉慶十七年三月初十日會同西寧辦事大臣福公克精阿

奏爲撤回西寧防河官兵事竊查黃河北岸鄂倫布喇克一帶巡防官兵上年九月經臣那彥成與文孚酌議遞減兵一百名仍派二百名於冰橋結凍後揀員帶領駐劄巡防奏蒙

聖鑒在案茲據西寧鎮總兵官特依順保稟稱現在春融冰泮所有上年派出之都司姚魁帶領官兵已經

照例撤回於二月初九日全數歸伍等情前來臣
等復查西寧番族數年以來實已凜服

天威不敢稍有滋事是以去冬至春青海衙門尙無蒙古
呈報搶奪之案冰橋結凍後亦無野番偷渡搶竊
之事較前甚屬安靜各旗蒙古札薩克等屢沐

天恩無不知感知奮臣等仍凜遵

聖諭隨時勗以努力自強勿稍怠惰至前項防兵本年秋
冬之間應否撥派抑或裁撤之處屆期再當察看
情形另行籌辦謹

奏奉

硃批知道了

嘉慶十七年十月二十日會同西寧辦事大臣福公克精阿

奏爲西寧黃河北岸防兵照舊派撥事竊照西寧黃河北岸防守官兵自嘉慶十四年遞減後上年祇派西寧鎮屬官兵二百名揀員帶領在於鄂倫布喇克一帶分段巡防_臣等察看番情自去冬冰橋結凍派兵防守及本年春間撤回以後游牧相安青海衙門控告搶竊之案較前亦少各旗蒙古仰仗天威得以休養生息實爲萬分感奮本年九月間_臣福克

精阿曾將青海蒙古王公等籲懇照舊安兵緣由業已附片奏蒙

聖鑒在案現在冰橋將次結凍所有本年北岸防兵應請照上年派撥西寧鎮屬兵二百名仍飭該總兵於遊擊都司內揀派一員帶領責令嚴密巡防其官兵鹽菜口糧照例支給俟明年再看情形如果該蒙古實能振作自強可以全數裁撤再行請

旨辦理以節糜費謹

奏奉

硃批知道了

嘉慶十八年三月十六日會同西寧辦事大臣福

公克精阿

奏爲撤回西寧防河官兵恭摺奏

聞事竊查黃河北岸鄂倫布喇克一帶巡防官兵上年冬

間經

臣

等派撥西寧鎮屬官兵二百名於冰橋結

凍後揀員帶領駐劄巡防奏蒙

聖鑒在案茲據西寧鎮總兵特依順保稟稱現在春融冰
泮所有上年派出之都司姜邦治帶領官兵已經
照例撤回於二月二十日全數歸伍等情前來仍
俟秋冬之間再爲細查情形應否撥派抑或裁撤

之處屆期另行籌辦謹

奏奉

硃批覽

嘉慶十八年四月十六日會同西寧辦事大臣福公克精阿

奏爲番賊誤搶官馬傷斃弁兵獲犯審明分別定擬事
上年十二月二十四日據河州鎮總兵富明阿稟
稱據三營馬厰牧馬弁兵稟報二十日晚馬匹牧
放夜半時突有番賊十餘人撲入馬羣搶掠馬匹
經外委陝有貴率同牧馬兵丁施放鎗箭逐賊不

意番賊開鎗拒闕致將外委陝有貴鎗傷沉重武
舉海騰蛟亦被矛傷兵丁杜花曹有杰等亦各帶
刀箭傷馬匹多被驚跑四散官兵鎗斃番賊一人
馬一匹並奪獲毛搭連皮袋約二十餘件當時打
傷之賊該番均卽獸搜逃遁等情具稟請辦前來
臣等接閱之下不勝駭異查各番族衆近年以來
沐浴

聖化頗形安靜此次竟敢持械放鎗撲搶官厰馬匹傷及
弁兵實屬目無法紀但此事若遇事張皇固屬不
可若少爲遷就則無知番衆效尤轉致多事臣等

當卽派遊擊楊印花叅將會受將附近之保安河
州各營兵丁酌帶二三百名至隆務寺屯紮一面
飛飭該鎮及貴德循化兩廳營文武員弁帶領該
處通丁及寺僧昂買人等分入番地查拏復剗傷
西寧鎮總兵特依順保西寧道龍萬育就近馳赴
該處由北路兩面督拏總須不動聲色速將正賊
設法拏獲懲辦並一面曉諭附近各番族擒獻有
賞窩藏同罪嗣據各文武稟報拏獲番賊卡加什
加洛等七名陸續批解來省隨飭藩司何銑臬司
德克精阿蘭州道嚴烺督率委員蘭州府知府黃

方臯蘭縣知縣李醇和等將現犯研審明確招解

前來

臣

那彥成當卽知會

臣

福克精阿來省會同

提犯逐加研訊緣卡加什加洛係貴德屬剛咱族

番民於嘉慶十六年十二月十五日與法什特克

族番民尙云愛相遇各道貧難卡加什加洛起意

糾劫循化等處番子馬匹尙云愛允從卡加什加

洛隨邀隆本且但加轉邀納南木 冲奔 且楞

奔 貴德完的 且楞差 娘什者黑 安他且

令 完的初浪 班的納利 阿力剛楞綻 格

勿 南布加 加日拉 完的他力 于冬扎什

阿貴令沁 者什路又邀循化所管之沙卜渡
完的什加卜 什凝加 循化完的 什格洛共
二十五人約定十八日夜間各乘馬持械起身向
東行走尋覓有牲畜處搶劫十九日行抵甘家川
地方二十日早先令冲奔南布加加日拉循化完
的分南北東三路探聽有馬之處據循化完的深
至河州鎮屬馬廠地方見有羣馬在彼因未知是
官馬卽回向各犯告知卡加什加洛約至下晚去
搶卽囑令干冬扎什且楞奔完的什加卜在山看
守食物駝子完的他力患病亦留山未往卡加什

加洛令尙云愛執持且楞奔刀矛與且旦加等十
八人於二更時抵馬厰地方完的初浪娘什者黑
在遠處瞭望其餘十六犯撲入馬羣趕奪馬匹經
看守馬匹之外委陝有貴率領兵丁曹有杰等放
箭逐賊該犯等開鎗拒鬪卡加什加洛鎗傷外委
陝有貴咽喉倒地納南木箭傷兵丁杜花左膀倒
地尙云愛用刀砍傷曹有杰經武舉海騰蛟聽聞
鎗聲帶領兵丁各執鎗箭前往護馬卽放鎗箭傷
斃番賊者什洛一人並將番賊乘騎之馬傷斃海
騰蛟被賊執矛刺傷項左隨奮力率同兵丁向前

將賊殺退陝有貴因傷重移時殞命該武舉查收
馬匹計短馬共二十八匹次日找獲馬十九匹尙
短九匹維時番賊搶馬之時並不知係官馬迨至
天明瞥見馬身均有烙印始知所搶係屬官馬方
知打傷卽是官人名犯恐有官兵追捕畏懼之極
卽將搶獲之馬十三匹中途丟棄分路逃遁並未
敢將馬匹俵分等情先後所獲各犯供認不諱臣
等復加究詰因何肆行無忌敢於搶馬傷及弁兵
據該犯等堅供實因黑夜誤搶天明始知是官馬
十分畏懼中途丟棄馬匹各自逃避均未俵分馬

匹此外亦無另有搶劫別案加以刑訊矢口不移
查自來番族窮苦無依之人名撥浪古番犯脫逃
無獲官兵緝拏嚴緊則番目人等卽將此項撥浪
古送出頂替又因言語不通以致枉殺無辜最爲
可惡此案現獲各犯_臣等悉心研究並多喚通丁
隔別訊問實無頂替情事確係此案正賊案無遁
飾查律載強盜已行得財者不分首從皆斬又例
載盜劫之案各督撫嚴行究審將法所難宥及情
有可原者一一分晰於疏內聲明大學士會同三
法司詳議將法所難宥者正法情有可原者發遣

又例載響馬強盜執有弓矢軍器邀劫道路贓証明白者不分人數多寡曾否傷人依律處決梟首示衆各等語此案係番民在內地行劫應照刑律定擬查卡加什加洛起意糾衆劫奪馬匹復敢放鎗傷斃營弁夥犯納南木隨同放箭傷及兵丁核與響馬強盜無異卡加什加洛納南木二犯應請按例擬斬立決於行劫處所梟首示衆貴德完的同搶拒捕循化完的探引入厰二犯均係聽從行劫法所難宥亦應從重斬梟以示威懲且楞奔于冬扎什二人僅止在山看守食驢子完的他力因

病留山俱屬情有可原且楞奔于冬扎什均於取
供後病故應毋庸議完的他力一犯相應照例發
遣趕失馬匹飭令文武各員我覓歸廠所有爲首
之犯除卡加什加洛已獲辦理其尙云愛且旦加
隆布三首犯並夥犯十四名仍勒限嚴緝獲日另
結再此案係生番行劫內地官馬傷斃弁兵雖訊
係一時之誤亦應嚴懲以昭炯戒且該犯等不服
水土俱各患病不可致令倖逃顯戮所有例應梟
首之卡加什加洛納南木並法所難宥之貴德完
的循化完的四犯隨於四月十六日恭請

王命飭委臬司德克精阿中軍副將張大振綁赴市曹處
斬梟示訖謹

奏

嘉慶十八年五月初八日奉

上諭那彥成等奏番賊誤搶官馬傷斃弁兵獲犯審明辦
理一摺此案番賊卡加什加洛等乘夜持械放鎗撲搶
官廠馬匹除現獲各犯已分別正法發遣外其餘夥犯
勒恩嚴拏飭獲照例辦理外委陝有貴率同牧馬兵丁
巡賊致受鎗傷殞命著加恩照把總陣亡例賜恤兵丁
杜花曹有杰各受刀箭傷如傷已平復著以外委卽行

拔補若因傷身故卽照外委陣亡例賜恤其武舉海騰
蛟殺斃番賊一名身被矛傷仍能殺退番賊奮勇可嘉
著加恩賞給武進士准其一體殿試

嘉慶十八年五月初四日會同西寧辦事大臣福
公克精阿

奏爲續獲搶馬番賊首從各犯審明分別辦理恭摺會
奏事竊^臣等前將誤搶官馬之番賊卡加什加洛
等審明定擬恭摺奏

聞在案嗣據西寧鎮道暨廳營員弁續獲夥犯且楞差等
七名亦經附片具奏茲又獲首犯隆木一名當飭

司道督同委員研審明確招解前來臣那彥成親
加研鞫緣隆本係加咱族番民什凝加係沙卜浪
族番民上年十二月十五日卡加什加洛起意搶
竊卽先商令該犯隆本糾邀什凝加等共二十五
人乘馬持械於二十日晚赴河州馬廠地方劫搶
馬匹該犯隆本攜帶鎗箭並曾放箭傷及兵丁什
寧加攜帶鎗矛撲入馬羣並用矛格傷武舉海騰
蛟項左隨後分得馬一匹而逸迨次早知係官馬
並知所傷卽係官人遂各自畏懼乘馬潛逃茲據
緝獲嚴審實爲此案正賊毫無疑義至格勿班的

納利阿貢令沁三名雖曾聽從且旦加糾竊是日並未到馬廠今聞官兵緝拏且旦加首從各犯該番均自行投首且楞沙木一名實係良番因其子娘什者黑係案內夥犯逃匿現值緝捕嚴緊該番自行投出情愿代子領罪因其名與且楞差聲音相似獲解時遂誤譯爲且楞差又那安他策令一名因其兄安他且令亦係案內夥犯今逃避無踪該番情愿投出代兄領罪至格洛係循化廳牙隆番民亦屬良番因案賊什格洛在逃未獲該族頭目卽令頂什格洛之名作爲撥浪古強爲縛獻此

先後緝獲各番審明之實在情形也臣復查向來
辦理番案往往以言語不通或該番目賄買頂充
或通丁人等挾詐哄騙問官等少不留心率多枉
戮此次各犯本係一時誤搶迨後知係官馬不敢
分贓卽時丟棄逃匿已屬情有可原而且聞拏卽
行投首及代子代兄甘心領罪等情其恭順畏懼
之情實屬可憫此皆蒙

皇上厚澤遐敷覃被化外各番凜畏

天威至此之極若皆科以刑律之罪固屬應得惟其中聽
從行劫之夥犯類多陷於無知臣等旣知番地情

形自不可漫無區別有獲必誅以致草菅人命深負我

皇上好生之德意查首犯隆本糾約多人持鎗箭誤劫官馬夥犯什凝加聽從上盜用矛拒捕得分馬匹實屬法無可貸均應按律卽行正法梟首示衆至格勿班第納利阿貢令沁三犯係屬自行投首當日既未在场核與自投免罪之例相符且楞沙木係屬以父代子認罪那安他策令係屬以弟代兄認罪格洛一名竟係無辜之撥浪古情節甚屬可矜臣那彥成與在省司道暨西寧河洲兩鎮悉心推

鞠隔別問訊並札商臣福克精阿意見相同除將首犯隆本從犯什疑加恭請

王命飭委臬司德克精阿中軍副將張大振綁赴市曹處斬梟示外其餘格勿等六犯應請

皇上施恩樂予省釋示以恩信至此等番犯自應恭候

批示回日再行發落但番子向多不服水土最易生病若稽遲時日致令病斃轉令各番仍多疑懼亦非示信外夷之道臣等不揣冒昧公同相商令其看視隆本什疑加行刑後卽交昂貴等解回番地曉以恩信使知

天朝法令有罪必誅倘情有可原亦不枉殺一人令其畏威而兼懷德邊氓可期安輯仍責令將正賊獻出並飭傳諭各番族從此謹守法度永戴

大皇帝高厚之恩不可再行搶竊自蹈誅戮該番等伏地叩頭涕泣而去實有萬分悚懼形狀其未獲之首犯尙云愛且旦加仍勒限嚴緝獲日另結謹

奏奉

硃批刑部知道

嘉慶十八年八月初三日會同西寧辦事大臣福公克精阿

奏爲遵

旨查明西藏喇嘛與西寧喇嘛互爭糧戶布施一案大概情形及歷年案據恭摺先行覆

奏事竊臣那彥成前赴西寧閱兵事竣於七月二十四日回至碾伯縣之冰溝途次接准軍機大臣字寄嘉慶十八年七月二十日奉

上諭瑚圖禮等奏據西藏布資綳寺內喇嘛等稟稱西寧地方有布資綳寺所管噶勒丹彭錯嶺寺院一座原係從前建修興旺黃教嗣有紅教札烏喇嘛江巴曲達爾身係喇嘛又於西寧地方請給百戶頂戴欲將該寺毀

壞踐踏黃教該喇嘛等屢向駐藏大臣處控訴曾移咨西寧辦事大臣查辦仍各爭執未能允服瑚圖禮等接據該喇嘛等稟懇代奏以所控人證地方寺院俱係西寧所管請飭交福克精阿就近提集人證剖斷等語此時黃教紅教喇嘛彼此互相爭競屢控不服事關緊要著那彥成親赴西寧會同福克精阿秉公查辦札烏喇嘛江巴曲達爾身充喇嘛何以給有百戶頂戴不僧不俗殊乖體制其頂戴係由何人給與是否奏明賞給抑係由該處辦事大臣自行給與著那彥成先行查明如係奏明賞給從前援照何例呈請曾否有辦過舊案亦

着詳查聲敘覆奏那彥成曾任西寧辦事大臣或係伊
任內之事亦不可稍有迴護至此案據瑚圖禮等摺內
所敘情節彼此各執一詞是否札烏喇嘛欺凌黃教抑
彭錯嶺寺住持喇嘛霸佔札烏地方糧戶著那彥成等
溯查根據秉公剖析不可稍有偏袒諱飾一切據實奏
明候旨核辦瑚圖禮等原摺著抄寄閱看欽此臣那彥
成隨卽折回西寧會同臣福克精阿檢卷查核所
有札烏喇嘛因何給有百戶頂戴一節溯查

本朝平定青海安插番族雍正十年經散秩大臣達鼐
將歸隸西寧管轄之玉樹南稱等番民四十族奏

定貢賦額數及住牧地方四至計札烏共有四族
分爲上中下附四處每年納馬折銀印冊可據至
千人以上之部落設千戶一名百人以上之部落
設百戶一名亦經達爾奏准印給委牌並准其子
孫世代承襲在案嗣經和碩怡親王條奏番族內
之千戶百戶等俱有官職請令各照品級准戴帽
頂經兵部議定准照土官品級千戶用正五品帽
頂百戶用正六品帽頂轉行遵照各在案所有札
烏喇嘛一族自雍正十年安插西寧伊族莫爾根
溫布桑吉丹怎以後俱照例具

題承襲至現在之喇嘛江巴曲達爾於嘉慶八年承襲人經五輩俱用正六品帽頂是札烏喇嘛之百戶頂戴係照例遵辦有案可據至西藏喇嘛與西寧札烏喇嘛互爭糧戶布施一節查札烏地方舊有七寺所稱噶勒丹彭錯嶺寺卽居其一原建年分及是否西藏喇嘛所建實不可考該處俱係紅教喇嘛舊有西藏黃教喇嘛二人來寺坐床教經每屆六年換班一次寺內黃教坐床喇嘛二人之外並所收之徒弟亦止二十餘人其寺院實屬札烏喇嘛之地並非西藏布資綑寺之地至嘉慶十三

年前任辦事大臣文孚先據札烏喇嘛善納卷吹達爾卽江巴曲達爾呈控西藏喇嘛洛木藏加木養加楞洛卜藏納木加立等二人霸佔該寺強收布施經文孳飭候委官查辦而西藏布賚綳寺喇嘛亦以札烏喇嘛阻擋布施踐踏黃教等情在藏稟控十四年西寧派出千總張祥四川派出都司馬永魁二員前往查辦札烏喇嘛則執有前任大臣達爾所給印照通事等驗明屬實而西藏喇嘛所呈藏中之執照據稱是章嘉呼圖克圖所給然驗係白紙並無圖記是西藏喇嘛似止應在彼換

班住坐傳習經典以興黃教不應將札烏之寺院
人戶一併霸佔當經兩省委員明白勸諭兩造各
具甘結業已完案詎十五年布賚綳寺喇嘛又復
在藏翻控前任大臣文孚接准移咨復委主事岱
青阿前赴查辦有西藏遣來喇嘛二人向委員面
訴求將彭錯嶺寺並所屬人戶差徭概行給管委
員諭以西藏喇嘛仍准在寺住坐念經番族中有
情愿布施者照舊收取但不准霸佔札烏寺院人
戶勒取布施等情該喇嘛等仍各堅執不從經文
孚移咨駐藏大臣諭飭去後案懸未結本年

臣福

克精阿復接瑚圖禮等來咨以布資紉寺喇嘛仍行具控值五月間派出主事瑚圖克都司杜尙賢等前往玉樹番地會盟之便卽委該主事隨帶案卷親赴札烏地方再行確切查明秉公剖斷惟番地遼闊歷年會盟之委員往返必須半載前案現尙未據稟覆茲瑚圖禮等奏奉

諭旨令臣等會同查辦查札烏喇嘛世襲百戶頂戴之處既有奏定案據布資紉寺喇嘛不知妄控將來定案自應咨令第穆呼圖克圖明白曉諭外其彭錯嶺寺院旣在札烏地方札烏百戶自雍正十年至

硃

今納貢當差由來已久且地界戶口糧賦等項責

海衙門舊有雍正十年印冊則是札烏之地確切

可憑西藏喇嘛止應赴彼坐床教經豈容佔及札

甚是曲在西藏無疑

烏之寺院糧戶且所呈章嘉呼圖克圖給與之執

照又係白紙似不足憑臣等就歷年卷宗反覆查

核此案似係西藏喇嘛倚恃作興黃教遂欲欺壓

紅教因在札烏坐床年久希圖併佔札烏之糧戶

以致案結復翻其情形已可概見查札烏係屬紅

教洛布藏加木養等係屬黃教固應作興黃教抑

是

遏紅教第曲直攸分亦不可過爲偏袒現在兩造

各執一詞所有歷年由藏前來住持之喇嘛是否
由藏派赴住持抑係由彭錯嶺寺僧俗延請必須
查明根底所控札烏喇嘛與卡爾通事歷次串通
捏混之處是否實情亦應訊明究辦至該處寺院
及糧戶布施似應仍歸札烏百戶喇嘛管理而該
寺住持之喇嘛應否仍由西藏選派法度喇嘛按
年更換止准收取戶民情愿之布施不准爭佔札
烏額定之糧戶此非兩造齊集定案斷不能折服
其心惟札烏地方距西寧郡城四千餘里自札烏
至前藏約計又有三四十里程途實屬寫遠瑯圖

禮等雖經奏稱已咨令第穆呼圖克圖將原告押赴西寧以備質訊但長途押解行走番地急切不能解到現查西藏尙無咨報起程日期且此項喇嘛瑚圖禮等是否派兵協解抑止令第穆呼圖克圖派人押解之處未准咨明臣等現已飛咨瑚圖禮等查明此時原告喇嘛究竟能否解來及於何日起解先行咨明並將現在臣等所查根據咨明瑚圖禮等可以就近傳訊原告及另有別情咨覆到日再行辦理其被告之喇嘛江巴曲達爾已派熟悉通事一二人前往傳喚該喇嘛曾在西寧具

卷二十二
三
控且其理似直可無慮其不來惟程途既遠原被
急切難齊臣那彥成再三斟酌自不必閒住西寧
日久守候現於拜摺後卽由西寧起程前赴涼州
巡閱滿營閱竣回省卽辦武關考試彼時或西藏
將原告解到卽提同被告人証秉公審斷或前派
之委員主事瑚圖克等就近可以查明完案亦卽
另行具奏請

旨定奪其寧夏滿漢各營官兵俟無事時再容定期巡閱
再此案欽奉

廷寄由四百里

臣等是以由驛馬上飛遞奏謹

奏

嘉慶十八年八月初三日會同西寧辦事大臣福公克精阿

奏

臣等竊思辦理邊情全在持以鎮靜斟酌權宜不得

與治內地民人一概繩以官法此案瑚圖禮等照依喇嘛呈詞卽行具奏且飭第穆呼圖克圖派人解送西寧道路旣遠萬一中途脫逃則案難卽結設竟抗不前來又將何以辦理臣等原擬派官職較大之員迎赴前途如果起解在途則押解前來

若未起身則就近在彼審斷亦可結案第自西寧
出口必經過果洛克等處地方且有數日並無蒙
古烏喇之處今若止令官員數人前往實不放心
若帶領多兵護送亦甚不值况番地八月間卽已
大雪封山人馬不能行走所有委員人等只可俟
至來歲春融再行前往再此案情由僅係兩地喇
嘛因爭奪布施涉訟實爲夷情嗜利之常與內地
民人田土詞訟無異且其寺院旣小住持喇嘛統
計人數無多其原呈所稱恐與札烏喇喇嘛成大
事等語明係危詞聳聽卽使兩造小有爭端亦祇

邊外常事又非如喇嘛之爭奪黃教紅教恐肇釁
端關係重大者比似應仍照常案辦理臣等再四
斟酌意見相同謹將管窺所及上陳

聖聽謹

奏奉

硃批此事係瑚圖禮等冒昧另有旨諭彼二人矣

嘉慶十八年八月十七日軍機大臣字寄奉

上諭那彥成等奏查明西藏喇嘛與西寧喇嘛互爭糧戶
布施大槩情形一摺據稱札烏喇嘛世襲百戶從前有
奏定案據世代承襲布施資紉寺喇嘛不知原委係屬妄

控其彭錯嶺寺實屬札烏喇嘛之地並非西藏布資綳
寺之地札烏百戶自雍正十年至今納貢當差由來已
久且地界戶口糧賦等項青海衙門舊有印冊可憑該
處俱係紅教舊有西藏黃教喇嘛二人來寺坐床教經
每屆六年換班一次近年來因在札烏坐床年久希圖
併佔札烏之糧戶以致案結復翻等語此案既據那彥
成等查明札烏喇嘛所給百戶頂戴係世代承襲久有
案據而彭錯嶺寺院確係札烏喇嘛之地西藏喇嘛因
在彼坐床教經輒欲佔其寺院糧戶所呈執照並無圖
記是此案爭控情節出在西藏喇嘛已無疑義瑚圖禮

等前此未經確查卽據稟代爲陳奏殊屬冒昧今旣據
那彥成等查明所控屬虛該喇嘛等無論紅教黃教俱
應一視同仁秉公剖斷著瑚圖禮等向第穆呼圖克圖
剴切告知令其傳諭該喇嘛等以彭錯嶺寺曉旣係札
烏喇嘛地方厯年久遠確有憑據西藏喇嘛不應妄行
佔據且藏內廟宇甚多又何必遠佔他廟致滋訟端設
西藏廟宇如有被人侵佔之事亦必爲之從公理論不
能意爲偏袒如此嚴切曉諭該喇嘛等自知理屈卽可
不致再有訐訟其札烏地方向有西藏喇嘛二人前往
教經六年更換此時該處喇嘛習教已久經典諒皆熟

諸嗣後西藏喇嘛自毋庸派往更換以期永杜爭端至
前據瑚圖禮等奏稱將原告喇嘛押赴西寧以備質訊
但長途行走有需時日急切不能完結瑚圖禮等接奉
此旨若此項喇嘛尙未起程即可毋庸解往著就近明
白曉諭自可完案息事如已押解在途著照那彥成等
所奏卽令西寧派出之委員胡圖克等查帶案卷就近
剖斷免致往返又致延緩

家回

嘉慶十五年七月二十三日

奏爲浩罕夷使行抵哈密所需車輛過多軍臺不能支
應飭令該處廳營量爲協濟護送起程事竊臣接
哈密辦事大臣成書札稱浩罕夷使於六月十五
日到哈密騎馬十九匹其行李貨包秤重五萬三
千餘斤詢係沿途添買貨物愈積愈多計需車八
十八輛內有侍衛忠安自置車五輛仍用官馬拉
送向來關外驛站自哈密以西俱由軍臺辦送軍
臺額馬臺車均屬有限不敷支應擬令該使將額

外多帶貨物自僱車輛載運仍將侍衛忠安叅辦等語臣復查浩罕夷使所執兵部車票准給車三

輛火牌內准騎馬十四匹今騎馬至十九匹又需車至八十餘輛實屬過多軍臺車輛本少成書因哈密係軍臺首站若如數支應致滋各臺之累自係照例辦理不肯濫應本無不合惟查該使重譯

入

觀其意甚誠其名甚正仰蒙

聖恩優加體恤厚往薄來使邊遠之人無不樂荷

帡幪輸誠歸向今因乍入內地所見之物皆其實貴不免

隨地置買藉圖微利此亦回夷見小之常態業已
行至中途未便令其留滯如必拘泥火牌斤斤與
較似無以示

天朝寬大之恩是以該使前過陝甘時臣飭令各地方官
寬爲應付令得順行無阻示以大方仍諭以此次
應付車馬均係仰體

皇仁格外優恤下次不可再有多帶貨物致滋騷擾等語
該使等俱帖服感激而去今成書因其貨物帶多
以致軍臺車馬不敷支應該使等又惜小費不肯
自僱車輛載運彼此相執竟自停住亦似不成事

體臣隨卽飛飭巴里坤總兵及哈密副將通判等
官令其協同設法量爲接濟俾免阻滯並知會前
途一體照辦以仰副我

皇上柔遠綏來之至意計算此時該使等亦已起程無阻
應卽附便奏

聞至侍衛忠安乘勢違例私帶貨車五輛業由成書叅奏
辦理臣毋庸再行附叅謹

奏

謹按嘉慶十五年八月初七日廷寄內奉

上諭那彥成奏浩罕來使所需車輛過多飭令協濟前進

一摺此事前據成書奏到該來使需車過多商人等夾帶貨物有干例禁已諭令成書查明商貨概行駁斥並將違禁商人交該督照例治罪其首先濫付之州縣並令據實查叅侍衛忠安亦已革職交審那彥成發摺時尙未接奉前旨著卽遵照前降諭旨妥爲查辦分晰具奏

嘉慶十五年八月二十七日

奏爲遵

旨查辦浩罕夷使多用車輛恭摺先行覆

奏事竊查浩罕夷使回至哈密用車過多經辦事大臣

成書查明具

奏嗣奉

諭旨令

臣

確查此次多給車輛始於何站據實叅奏令成

書查明商貨概行駁斥將該商移交究訊三等侍衛忠安車輛擅用官馬拉送又未能約束夷使降旨革職交

臣

一併審擬具奏查甘省爲新疆來往大路向來

西藏堪布及伊犁南路各回子伯克年班往往有例外多用車馬多係通省通融捐辦報部時仍按例報銷此次浩罕夷使過境例外多用車輛臣經批查各州縣該使有無包攬奸商客貨與否旋

據稟稱並無包攬貨車實係該使自置茶葉花椒
及綢布磁器等物彼時臣以浩罕來使不常朝
覲與奸商不相熟識所稟並無包攬私貨之處想係實情
外夷得見中國貨物以爲寶貴自不免貪多置買
因卽批令准其應付惟查甘省向用車輛均係木
輪單馬不能載重而該使等知臣飭查嚴緊又將
所買之貨歸併載運以致木輪多有折壞行走亦
遲過蘭以後途次或有添買是以用車漸多嗣至
哈密成書以用車過多將伴送侍衛忠安一併叅
奏今又於本月二十日奉到前摺

批廻欽奉

諭旨令遵前旨妥爲查辦等因查驛站車馬本有定額奉
差供應亦有定例不肖官吏往往遇

欽差或上司經臨藉差逢迎自應嚴查究辦此次應付浩
罕夷使雖與藉差逢迎有間但該使私行包攬奸
商貨物或忠安又有串通使令包攬從中牟利更
不可不嚴行查辦臣已飛移成書令將忠安派員
押解來省以便審訊並飭令哈密廳營一面嚴密
查察該使等實在有無包攬私貨並將該商人姓
名查明一同解省從嚴辦理至該夷使已至哈密

未便令其留滯中途因復札飭哈密廳營曉諭夷使伊等果知畏懼將串通之奸商指出或將其私帶多餘貨物就地減賣所有車馬不至過多卽當酌量協濟護送俾令前進以上體

聖主柔遠綏來至意適據該廳營稟稱夷使現將所帶貨物就地變賣卽可料理出境等語計日內已可行動不致留滯至該使經由各州縣如果有奸商賄囑夷人夾帶貨物而各州縣漫無查察濫應車輛令奸商與外夷交通牟利亦大有關係且曾經臣批查又未據實稟報自應重治其罪一俟查明卽

當遵

旨據實嚴叅不敢稍有徇庇倘止係夷使所帶貨物亦俟成書確查覆到另行辦理具奏謹

奏奉

硃批知道了

嘉慶十五年十月十三日

奏爲遵

旨查明浩罕夷使多用車輛並無夾帶商貨及審明已革侍衛忠安各緣由按擬具

奏事竊浩罕夷使回至哈密多用車輛及三等待衛忠

安擅用官馬拉送自僱車輛又未能約束夷使一案經成書叅

奏奉

旨飭交

臣分別查辦並將侍衛忠安革職一併審擬具奏

欽此

臣當查此次浩罕夷使多用車輛先經嚴飭

經過之州縣查稟並無夾帶商貨惟甘省車輛向係木輪單馬不能載重以致一車改爲兩三車不等沿途用車漸多等情先經查明具

奏奉到

諭旨令遵前旨妥爲查辦等因復經臣飛飭哈密廳營密

查夷使實在有無包攬商貨查明商人姓名解省
審辦至州縣有無濫應車輛失察奸商與外夷交
通牟利一節尤關緊要仍查明嚴叅一面飛移成
書委員將忠安解省審訊恭摺先行行覆

奏仰蒙

聖鑒在案茲據哈密廳營稟覆查得夷使實係自置茶葉
綢緞磁器等物委非夾帶私貨亦無商人同行現
在該使已將置貨就地售賣減用車十輛已於八
月十九日起程前進沿途行走甚爲安靜等情并
准成書札稱夷使實皆自置貨物委無私帶商貨

等語隨據委員將忠安押解到省臣親提至署督
同按察使積朗阿西寧道慶旻逐一研訊據忠安
供我奉差護送浩罕夷使自京起程夷使看見中
國茶葉綢緞磁器之類沿途陸續置買致各站添
車一二輛不等行至甘省又係木輪單馬難以載
重屢次折輪更換逐日加多我曾吩咐通事曉諭
禁止無如外夷見小貪利不肯聽從又因行程緊
急恐悞差使只得通融過去夷使貨物實係自行
置買並非夾帶商貨亦無商人同行已經哈密大
臣查訊明確不敢隱混至我出京時所執勘合內

填註引包馬共十四我自己僱車五輛拉運行李
是自已長行馬匹並無帶貨實在止騎站馬七匹
後到肅州因拉車馬匹疲乏卽用站上拉車之馬
五匹拉運自僱車輛外騎馬三匹實共用馬八匹
尚不足十匹之數並不敢額外多用惟我護送夷
使不能約束致令沿途多用車輛實屬糊塗只求
奏請治罪等供覆加究詰堅供不移此案已革侍
衛忠安護送夷使應用驛站騎馬其隨帶行李車
輛訊係自僱所領兵部勘合內本應騎馬十四今
止用馬七匹到肅州止用馬八匹核與例給馬數

有減無浮臣又復飭查各站與忠安所供馬匹數目相符惟不能約束夷使以致多用車輛實屬咎無可追忠安業經革職應毋庸議惟其身尙有輕車都尉雲騎尉兩世職據供父母俱在並無弟兄可否革去侍衛仍留其所襲世職之處出自

皇上天恩至支應車輛之各州縣尙係爲辦理差使起見與

欽差上司過境逢迎濫應者有間且亦無失察夷使串通奸商包攬私貨因而濫應之事情尙可原業經前

奏聲明欽奉

硃批知道了在案似應請免查叅至忠安業已訊明已飭
委便員帶送進京交該旗收管謹

奏

嘉慶十五年十月二十八日奉

上諭那彥成奏查明侍衛忠安護送浩罕夷使多用車輛
一摺該夷使沿途添車裝載貨物既稱訊明實係自行
置買綢疋磁器等件並無夾帶商貨在內該侍衛曾經
曉諭尙非有心容縱忠安現已革退侍衛其輕車都尉
雲騎尉兩世職著照該督所請免其斥革回旗當差仍
罰世職俸一年以示懲儆餘依議摺併發

嘉慶十六年九月二十二日

奏_臣於展

觀時面奉

聖諭令查哈廸爾沿途行走是否安靜車馬有無多支等

因_臣隨差妥弁赴關迎接併密查去後茲據稟稱

哈廸爾於九月初四日進關前途騎馬十九匹單

套圈車二輛行走迅速甚爲安靜等語并據肅州

鎮及沿途州縣稟報無異_臣查哈廸爾出京時兵

部填給勘合內開共騎引包馬十六匹今多用馬

三匹單套車二輛雖屬逾額究覺爲數無多自應

仰懇

天恩免其叅處至哈廸爾經過地方甚屬安靜並無需索

滋擾之事謹

奏奉

硃批覽

嘉慶十六年十二月初一日

奏爲遵

旨籌撥阿拉善糧石事本年十一月二十五日准理藩院

咨欽奉

上諭理藩院奏阿拉善札薩克親王瑪哈巴拉等呈請借

給糧石一招該旗地方偶被荒歉著交陝甘總督稽查
於就近各縣倉貯糧石內撥借二千石交該親王等會
同駐劄寧夏之部員認真散放所借糧石著該督按依
市價估報照例於瑪哈巴拉多爾濟色布騰莽噶拉等
應得俸銀內每年坐扣一半歸款欽此

臣

隨與署藩司

積朗阿等議查得甘省之寧夏府屬及涼州府屬
之鎮番縣均與阿拉善地界毗連現在鎮番縣倉
貯充足應卽就近撥出糧二千石接濟該處至阿
拉善地方秋冬春三季該蒙古駱駝向係僱給民
間客商載運貨物大半由鎮番行走現在之糧與

其官爲運送糜費腳價事竣仍須在該蒙古王公等俸銀內加增扣算或派往運送之夫役從中侵盜短少事亦不能保其必無均非仰體

聖主綏懷藩服之道莫若令該蒙古自派旗下人等押帶駱駝就近前赴鎮番搬運公私實爲兩便臣仍一面劄委涼州府前往公同監視足數給發不得少有剋扣一面照會瑪哈巴拉等遵照運回會同駐劄寧夏之部員認真散放俾該蒙古等均沾實惠再此項糧石仰蒙

天恩俯准所請仍按依市價於瑪哈巴拉等俸銀內每年

扣半歸款臣覆查現在寧夏府屬糧價較昂卽鎮番縣市價每倉石合銀亦在二兩四五錢左右若照依市價扣算未免過多亦非所以仰體

皇仁可否仿照大路州縣採買之例每倉石以銀二兩合算計倉斗糧二千石共應銀四千兩俾蒙古生計益臻寬裕出自

皇上逾格施恩再此項糧價銀四千兩並請無庸於該蒙古王公等俸銀坐扣查現有每年吉蘭泰鹽務案內

恩賞瑪哈巴拉等銀八千兩卽請就此項扣半歸款更爲

簡便可否伏候

聖裁謹

奏奉

硃批照所請行戶部知道

嘉慶十七年三月二十九日

奏查阿拉善札薩克親王瑪哈巴拉等呈請借給糧石

一案臣欽遵

上諭業將籌撥鎮番縣倉糧緣由奏蒙

聖鑒茲據該蒙古差員到此經臣飭委涼州府知府那縉

馳赴鎮番督率該縣跟同差員等將倉斗小麥二

千石照數監放自三月初六日起至十二日止據
報已經完竣倉書斗級人等並不敢少有短發該
蒙古等自帶駱駝紛紛負運均已旋回遊牧感激
天恩無不歡欣鼓舞謹

奏奉

硃批覽

嘉慶十八年五月初四日

奏爲舊吐爾扈特游牧處所被災遵

旨籌酌辦理恭摺奏

聞事嘉慶十八年四月十七日准理藩院咨具奏舊吐爾

扈特貝勒巴雅爾蟒奈呈報所屬游牧地方被災牲畜倒斃甚多請借十五年俸銀以資救濟等情行令臣委員前往該處查明被災情形如果屬實具奏辦理奉

旨依議臣復查十六年冬間阿拉善親王瑪哈巴拉因該處被災呈請借給糧石曾蒙

皇上俯准賞借糧二千石在案今事同一例如果被災屬實自應籌酌辦理查該蒙古游牧離省二千餘里臣問該處被災不至十分而連年所積頗形苦累今既准理藩院咨文行令辦理若往返奏查俟具

奏到日又由理藩院發給俸銀恐時日耽延過久
不及救濟是蒙古窮民仍不免於流離失所於安
輯邊境既有關係亦非仰體我

皇上懷柔惠遠一視同仁之至意今

臣

同兩司酌商若照

所呈請借給俸銀仍須前至內地買辦亦多不便
爲救濟起見莫若照阿拉善上年之例借給糧石
卽在就近肅州撥給飭領今擬先備撥一千石亦
照上年二兩糧價由理藩院於應得俸銀內分年
坐扣如果一千石不敷俟其呈到再爲辦理謹

奏

嘉慶十八年五月二十二日奉

上諭那彥成奏舊吐爾扈特游牧處所被災請借給糧石一摺舊土爾扈特游牧處所上年被災牲畜倒斃頗形苦累該貝勒巴雅爾蟒奈呈報理藩院懇借俸銀以資救濟茲據那彥成奏該處被災情形屬實著施恩在於就近之肅州先撥給糧一千石以爲緩輯窮黎之用如有不敷該督再爲酌籌理藩院仍照二兩糧價在於該貝勒應得俸銀內分年坐扣俾得早資接濟用示朕一體懷柔至意

嘉慶十七年十二月初五日

奏爲護送喇嘛擬由外省委員逐程接護毋庸專派京員以節糜費以清驛站事竊照前後藏喇嘛年班進京從前祇派委筆帖式率同領催護送照料嗣因該喇嘛等經過沿途地方有冒報丟失物件加倍勒賠等事筆帖式職分較小不足以資彈壓於乾隆五十年間改派理藩院郎中或員外郎一員押送其經過地方由督撫揀派道員會同武職防護久經辦理在案近年以來前後藏喇嘛等往來行走甚屬安靜間有一二素性慙愚不諳內地禮法之人一經接護之道員武職等申飭曉諭卽知

畏懼至其所帶包物往往有例外多帶餘包亦係
例准自行僱運如果護送官員實力彈壓尙不致
滋事端惟由京派出之司員等其中固不乏奉公
守法之人然日久習慣亦止將約束照料委之地
方文武所謂彈壓實爲具文徒費供支甚至不肖
之徒藉差需索或自置私貨牟利或包攬客商私
貨得受僱價甚且教唆喇嘛等假作玉包以遂其
藉差訛詐種種擾累驛站無所不爲卽此次奇福
之案已可概見臣查從前平定新疆各城回子伯
克等年班原有由京派來侍衛押送嗣亦裁撤現

在口外護送只派筆帖式及千把總等員入關後
甘肅陝西山西直隸等省均派道府廳州縣會同
武職分段接替均能安靜行走並無事故今喇嘛
與伯克事同一例合無仰懇

聖慈勅部會同理藩院核議嗣後喇嘛年班進京只須照
新疆伯克之例各省派令道府大員逐程接護彈
壓進京交各該管衙門照例辦理出京之日亦由
該管衙門派員送至直隸接遞押回毋庸專派京
員遠道往來致多糜費仍請

旨飭知駐藏及西寧大臣嗣後卽由各該處將年班喇嘛

之包照數點明咨行沿途各省知照以便應付車馬毋得任聽多帶致滋累擾臣爲清理驛站起見據實具奏謹

奏

嘉慶十七年十二月十九日奉

上諭那彥成奏請將護送喇嘛由外省委員逐程接護毋庸專派京員一招前後藏喇嘛年班進京理藩院派委司員押送原以資其彈壓近年喇嘛等行走俱各安靜而派出司員如現在辦理奇福一案轉有藉差騷擾驛站包攬貨物從中牟利者況沿途例派文武官員按程

接護足資照料實毋須再派京員徒滋流弊嗣後喇嘛
年班進京著照新疆伯克年班之例令經過各省遴選
道府大員會同武職護送彈壓出境交替至京交該管
衙門照例辦理其出京之日該管衙門亦祇須派員送
交直隸接遞所有專派京員護送往還之例著卽停止
以節糜費而肅郵政

那文毅公二任陝甘總督奏議卷二十二